

湖湘

熊治祁 编

湖南人物年谱

④

湖湘文库编辑出版委员会 湖南人民出版社

文库

熊治祁 编

湖南人物年谱

④

湖湘文库编辑出版委员会

湖南人民出版社



《湖南人物年谱》 各册谱主

第一册：周敦颐（1017—1073） 朱 英（1417—1485）
 刘大夏（1436—1516） 李东阳（1447—1516）
 陈洪谟（1476—1569） 陈思育（1532—？）
 陈纯德（1594—1644） 陶汝鼎（1601—1683）
 刘象贤（1607—1677） 王夫之（1619—1692）
 陈鹏年（1663—1723） 王文清（1688—1779）
 张 坊（1698—1774） 方 桂（1702—1786）
 陈大受（1702—1751） 张九钺（1721—1803）
 方应清（1729—1785） 邓显鹤（1777—1851）

第二册：陶 澍（1779—1839） 魏 源（1794—1857）
 梅钟树（1798—1841） 何绍基（1799—1873）
 邹汉勋（1805—1854） 罗泽南（1808—1856）
 王母鲍氏（1808—1882） 曾国藩（1811—1872）

第三册：胡林翼（1812—1861） 左宗棠（1812—1885）
 张时澍（1816—1898） 郭嵩焘（1818—1891）
 李续宾（1818—1858）

第四册：刘长佑（1818—1887） 梅鉴源（1824—1884）
 曾国荃（1824—1890） 吴大廷（1824—1877）
 陈钟英（1824—1880） 王 鑫（1825—1857）

娄云庆 (1826—1912)	黎培敬 (1826—1882)
王闾运 (1832—1916)	黄舒曷 (1834—1901)
涂启先 (1834—1899)	王先谦 (1842—1917)

第五册：李光久 (1845—1899) 冯锡仁 (1849—1910)
瞿鸿机 (1850—1918) 皮锡瑞 (1850—1908)
黄凤岐 (1851—1934) 释敬安 (1851—1912)
曾纪芬 (1852—1942) 夏思痛 (1854—1924)
吴恭亨 (1857—1937) 罗锡畴 (1858—1892)
易顺鼎 (1858—1920) 赵启霖 (1859—1935)
谭人凤 (1860—1920) 翁传煦 (1860—1897)
齐白石 (1864—1957) 叶德辉 (1864—1927)
谭嗣同 (1865—1898) 禹之谟 (1866—1907)
罗杰 (1866—?) 唐才常 (1867—1900)
欧阳知 (1867—?)

第六册：梁焕奎 (1868—1930) 熊希龄 (1870—1937)
黄兴 (1874—1916) 杨度 (1875—1931)
何叔衡 (1876—1935) 刘揆一 (1878—1950)
谭延闿 (1880—1930) 林修梅 (1880—1921)
宋教仁 (1882—1913) 蔡锷 (1882—1916)
宁调元 (1883—1913) 傅熊湘 (1883—1930)
李抱一 (1887—1936) 邓中夏 (1894—1933)
蔡和森 (1895—1931) 向警予 (1895—1928)
柳直荀 (1898—1932) 罗亦农 (1902—1928)
段德昌 (1904—1933) 朱湘 (1904—1933)
左权 (1905—1942) 叶紫 (1912—1939)

第四册目录

刘武慎公（刘长佑）年谱	 邓辅纶 王政慈初编 吴 獬重编 1
梅府君（梅鉴源）年谱	 梅颐杰编 152
曾忠襄公（曾国荃）年谱	 王定安编 萧荣爵增订 194
小酉腴山馆主人（吴大廷）自著年谱	 吴大廷自订 266
怀庭府君（陈钟英）年状	 陈 鼎 陈 鼐 陈 韬等编 337
王壮武公（王鑫）年谱	 罗正钧编 367
尚书峻山公（娄云庆）年谱	 娄立驹 娄梓昭编 432
竹间道人（黎培敬）自述年谱	 黎培敬自订 453
湘绮府君（王闿运）年谱	 王代功编 480
晚悔庵（黄舒曷）年谱	 邓崇甲编 597
先君舜臣府君（涂启先）年谱	 涂儒嵩编 619
葵园（王先谦）自订年谱	 王先谦自订 635

刘武慎公（刘长佑）年谱^①

邓辅纶 王政慈 初编 吴 獬 重编

卷一

嘉庆二十三年戊寅，公一岁

公讳长佑，字尔眷，号荫渠，一号子默，行一，又行二，晚年自号扶彝黑叟。先世故江西籍，有讳彦仁者，明洪武二十四年自吉安府安福县徙湖南宝庆府之新宁，居北乡尺木山，遂为新宁人。四世祖讳利贤，天顺十九年再迁县城东关外后街金城里，遂世居焉。江西刘氏迁新宁十馀支，各以所居地名其房。利贤公之来金城，始为砖屋，因称砖屋房刘家云。十世祖讳士元。十一世祖讳有义，号万庵，兄弟七人，万庵公其长也，妣许氏，生子五，公曾祖考其第四子也。曾祖考讳儒禹，字祗若，府学增生；妣鄢氏，生子二；继妣李氏，生子二；又继妣李氏。祖考继曾祖妣李氏所出，讳世贵，字秋文，国子学生；妣李氏，生子三：长讳时荐，更名祖培，字廷选，更字玉峰，县学生，娶李氏。次为廷才公。三讳时夔，字廷赞，号祖植；娶蒋氏。继祖妣曾氏无出。考讳时华，字廷才，别号宝泉，从九品衔；妣郑氏。三代以公贵，

^① 见《刘武慎公遗书》附，清光绪十七年金陵刻本。

皆赠光禄大夫。曾祖妣以下，皆赠一品夫人。自秋文公而上，世有隐德；至宝泉公，孝友纯至，乐善好施，秋文公即世，事继母曾太夫人，孺慕弥笃，人以为难事。详湘乡曾文正公所为《墓志》及清泉丁伊甫先生《墓表》中。

是年十一月十九日巳时，公生于金城村宅。前一夕，公伯母李太夫人梦大星落堂上，金光烂然。及生，遍体栗色，眉目间有威棱，两股黑癍隐起如鳞甲，口能容拳。性凝重有度，数岁即言笑不苟如成人。

是年十月初六日，玉峰公卒。

嘉庆二十四年己卯，公二岁

公外舅县学生李公德鹏妣林氏，以十月十六日寅时生李太夫人。德鹏公为公祖母李太夫人之侄，豪侠好义，李、曾两太夫人皆厚待之，故结婚焉。后受勋封如公官。

嘉庆二十五年庚辰，公三岁

道光元年辛巳，公四岁

道光二年壬午，公五岁

正月二十六日，次弟长佐生，字尔弼，号又卿。三月初十日，廷赞公之子长伟生，字尔俊，号子傅，行一。四月十七日，廷赞公卒。妣蒋太夫人，时年二十五岁。

道光三年癸未，公六岁

从同里王先生来珍学，《四书》、《诗经·国风》成诵。

道光四年甲申，公七岁

从同里王先生攻烈学，《诗经》、《书经》成诵。

道光五年乙酉，公八岁

复从王先生来珍学，《春秋左传》成诵。

道光六年丙戌，公九岁

从姑丈陈谷吾先生学于莲村，《左传》、《礼记》成诵。先生讳佳保，所居在南乡之长湖，去城十里。同学者堂兄守先公讳长保，字尔定，号笑山，时年十岁。四月初七日，继祖妣曾太夫人卒。六月二十四日，季弟长伸生，字尔扬。

3

道光七年丁亥，公十岁

仍从陈先生学，通《周礼》诸经，始学时艺。

道光八年戊子，公十一岁

仍从陈先生学于莲村。

道光九年己丑，公十二岁

从陈先生于长湖。一夕闻楼上窸窣声，仰视见一盗逾牖欲出，公一纵蹶其后，持盗足，盗反顾，则所识邻子也，笑而释去。后甲辰科自省试归，舍舟而陆，同人先行，独与一仆守行李，遗茶囊舟中，使仆返取之。林中出三四盗，其一人挈箱，余盗环伺未行，公戏以手按一盗肩，盗仆不能起，因拜乞命，余遂悉窜走，盖自童稚时已力过人如此。

道光十年庚寅，公十三岁

仍从陈先生学，始肆观诸子、史。

道光十一年辛卯，公十四岁

仍从陈先生学。同学者，弟又卿公。九月初七日，四弟长健生，字尔刚，号顺堂。

道光十二年壬辰，公十五岁

4 仍偕弟又卿从陈先生学。自前年以来，益力于学，为文喜深沉之思。解馆归，即偕弟读楼上，每拟题数十纸，投篋中，夜辄拈一题。宝泉公趣早息，辄灭火假寐，已而起，以被障牖，篝灯课帐中，文不成不寝也。

道光十三年癸巳，公十六岁

仍偕弟又卿从陈先生学。秋，应县试，列十名前。冬，应府试，知府惠体康公以公仪状非常，而文又有法，到底不懈，为童军所未有，大器之，取第一。

道光十四年甲午，公十七岁

仍偕弟又卿从陈先生学。春，应院试，取入新宁县学生员。学使为岳公镇南，字文峰。题为：“昔者赵简子使王良至第二句反命曰”。

道光十五年乙未，公十八岁

仍从陈先生学。春，应岁试，列二等。学使为龚公维琳。

道光十六年丙申，公十九岁

肄业府城濂溪书院，院长为邵阳谭海门先生，讳襄，丁丑进士。是冬，李夫人来归。

道光十七年丁酉，公二十岁

春，应科试，列二等。是岁，同县江忠烈公忠源得拔贡。五月，从陈先生、江公赴岳麓书院肄业，院长为安仁欧阳坦斋先生厚均。秋，应乡试，江公领乡荐。公随陈先生留院度岁。

道光十八年戊戌，公二十一岁

春，自省城归，应试列一等。学使为萧公良城。题为：“君子学道则爱人”。二月初三日，长子思询生。夏，仍赴岳麓。人众斋无可居，乃入城南书院肄业，院长为陈尧农先生。

道光十九年己亥，公二十二岁

仍肄业岳麓书院。秋归，为宝泉公五旬称祝。是年七月二十五日，尔扬公卒。

道光二十年庚子，公二十三岁

春，应科试，列一等。试毕仍赴岳麓。秋，乡试报罢，归里。九月初五日，次子思诣生。

道光二十一年辛丑，公二十四岁

春，应岁试，以一等一名补廪膳生。学使为张公铎，号振之。题为：“道得众则得国”。张公亟赏之。县典史刘公金芝延公教其

子，恒劝公迁家去，曰：“新宁将大乱。”公然之。刘公次年自引疾去，未数年，而雷、李二逆相继起矣。十二月十九日，三子思谦生。

道光二十二年壬寅，公二十五岁

同县郑公绍沛延公教其子。是年，为长子思询聘江忠烈公弟达川公女。

道光二十三年癸卯，公二十六岁

春，应科试，列一等一名。试毕，仍赴岳麓。秋试报罢，归里。

道光二十四年甲辰，公二十七岁

春，应岁试，列一等。学使为陈公坛秋。应乡试报罢，归里。陈谷吾先生领乡荐。是年六月二十四日，长女生。

道光二十五年乙巳，公二十八岁

道光二十六年丙午，公二十九岁

春，应科试，列一等。次弟又卿亦以府试第一，取入县学。夏，偕弟又卿赴岳麓山。院长为清泉丁伊辅先生善庆，见公文，即大器之，勖以经世之学，课必优等；乡试报罢，为扼腕太息。仍留麓山度岁。是年五月二十四日，次女生。

道光二十七年丁未，公三十岁

春，自省城归，应岁试，列一等一名，经古亦列优等。学使

为梁公同新，字榘亭，广东顺德人。试毕返里。四月，即赴麓山，留麓山度岁。

道光二十八年戊申，公三十一岁

正月初七日，四子思训生。是年，仍留麓山度岁。计前后肄业麓山十一寒暑，留度岁者九，然每堂上寿，常归祝也。公书法为同辈冠，坦斋、伊辅两先生皆亟称之。同县江、陈二公在麓院最有能文声，时谓得公而三矣。

道光二十九年己酉，公三十二岁

正月自省归，应科试，列一等一名。弟又卿与族叔岷庄公亦同列一等，又卿补廪膳生，公考取拔贡生。梁公喜甚，谓其子：“此次得一黑大人。”盖以器局，知公之必显矣。七月，会考，列十名前乡试榜前。归次湘乡，梦在岳麓魁星楼下，见同学黄麓生、汪仙甫诸公在上，呼公上楼，公甫上梯，将及楼，见魁星下座，公不敢前，乃立于梯上。魁星以所执大笔向公额上一点，曰：“去！”公骇醒，房中金光如白昼，公曰：“店主何至夜深尚未熄灯也？”金光乃没。公知是科又下第，且此科后即不能再应秋试，神固预示之矣。时宝泉公卜期十月十五日肃宾祀祖。

十三日，教匪李沅发等作乱，县城失守。沅发者，会匪雷再浩党也。公方自省归，闻仓卒乱起，急趋视市中，有裹红巾者。乃返金城，自举棹材抵大门，手大凳冲屋后垣，垣倒，负父母出，家人从之，遂避之西乡。十四日，闻贼已戕县官及院长陈谷吾先生。于是宝泉公携眷至冻江口，雇舟赴府城。岷公之封翁携眷至石田村，使公与岷公徒步入府署告变。知府张公镇南命先归，集团助剿。乃约二十八村乡勇，各以腰牌为识。先议合围，张公

至，长宝道杨炳坤亦率营至。杨公忽疑乡勇不可信，令驻十里外，惟营兵得近城。贼势遂张，日出挑战，兵伤者甚众。公乃约诸绅见张公，请开地道。张公甚喜，进驻城东，于东北郭掘地道，昼夜轰击。贼知不可据，出北门穿官兵营逸去，窜深冲洞。公率乡勇追之，一日驰百里，歼贼百余人。贼窜广西兴安苗山中。公与岷公方谋穷追剿灭之，而杨公以李沅发全股尽歼上报，即日撤团勇归矣。十二月，公遂归府城度岁。

道光三十年庚戌，公三十三岁

8 正月，奉堂上及家人自府城归里。李沅发之逸入兴安也，广西大吏奏闻，请兵楚督裕泰公督师新宁。参军事者张开霁，乾州厅人，数称公才。裕公寓王氏祠，与公家邻，一见大器公。公策李沅发无远志，决其穷必归新宁。裕公再三敦督，公遂檄领乡勇御贼于黔、粤边界苗瑶山中。彭刚直公随永州镇标兵亦追贼至界，一见如故交然。宝泉公屡以书来趣入都，迫令解兵事与计偕。四月，以营勇交堂弟长伟管带，辞裕公北上。未几，李逆为黔、桂兵遏剿回窜，据大金峰岭自固；又屡败，以十余人守石洞中。长伟擒之，扎竹轿上舁至公丈人李德鹏家。德鹏遣急使借学官轿舁之送裕公所，赏花红一千串，领得四百串。奖长伟六品军功，既而保把总，从曾文正殉难靖港，以千总议恤，赏云骑尉世职焉。

李沅发，本县南对河水头村人。其地大山，与广西全州、湖南东安邻，大山中愚民皆被诱入会者。李逆之起，为加粮戕官，事出仓猝，故未号召。其反也，意图尽约会中人再乱，而李德鹏先已开谕会中，诣官具悔状，故李逆遂穷伏诛云。

公五月抵都，寓宝庆会馆。时曾文正公官礼部，极相重，如故交。既试报罢，尊教谕职候选。遵宝泉公命，将入监肄业。

六月，连丁内外艰，家人虑道远不胜哀毁，止以太夫人忧讣，但云宝泉公亦微疾。曾公醺同乡官来唁，且袖十二金为赙。公闻讣，顿地擗踊，辄昏绝。又心忧父疾，刺指血疏天求益寿，所过大佛寺，必疏吁不懈。至城东二十里，知太夫人逝在六月十一日，宝泉公即以十四日捐背，大恸，又踣绝，久始苏。日夕拊柩号，逾期犹粥食，柴毁骨立，见者涕零焉。十二月，葬西乡杨溪村鸾岭。是年十月十六日，五子思谨生。

咸丰元年辛亥，公三十四岁

大学士赛尚阿督师征广西金田，疏调江忠烈公募勇五百人赴军。江公约公偕，以丧辞。既而大军围永安，提督向忠武公荣与都督武壮公乌兰泰议军事不合。江公知且败，引疾归，暇辄过公，扼腕相太息。

咸丰二年壬子，公三十五岁

受邑令戚公天保聘，主讲维新书院。二月，贼溃永安，扑桂林。乌公以创卒于军。江公闻警，以大义责公，当偕其弟壮节公忠济添募五百人续来。江公即行，公不敢辞，以三月二十一日至。军桂林城北，合新旧所部千七百人，名楚勇，是为楚勇之始。二十五日，移军城东鸬鹚洲。二十八日，江公方入城计事，贼来攻，公败之，追击至城南大花桥，又大败之。三十日，楚勇会秦恭武公定三、壮节公开隆阿诸军力战，又连败之福隆墟，焚其垒，及斗鸡山下贼垒一时并烬，遂解桂林之围。

四月朔，贼分路北窜灵川、兴安。官军亦分三路追之，合击之兴安县之严关口，会秦军由间道抄贼，又败之全州之碎井头。贼窜全州，将窜永州，公从江公扼之蓑衣渡，战两昼夜，大败之。

又从灌阳追击之，败之鸭碧渡。时向忠武病，以重兵留桂林，夹岸无一兵截剿。贼遂掠船北渡，五月，袭据道州。六月，分股窜江华、永明、蓝山、嘉禾。七月，又袭破桂阳、郴州。是时，总督程公霁采以重兵驻衡，不能分军防郴。楚勇虽屡有斩获，而江部不及二千，诸营皆尾贼后。贼且败且掠，连陷七城，遂进陷安仁、攸县、醴陵，窜据长沙城南之妙高峰。公初至军，每以选锋为言，及追贼道州，忠烈属公任其事。两日得敢死士五百人，遂率以攻据郴之贼，败之陈家桥。

八月，闻长沙戒严，江公乃留其叔弟壮节公忠济、游击李辅朝领千五百人攻郴，自与公以选锋卒五百随忠壮公和春下援。十三日，抵长沙，遂自湘西出溁湾市渡湘至城北。公以城东南隅地势高瞰城中，恐贼先我据之，谋于江公，以十六日分队傅城而东，密请和春以营帐器械从，遂驻营天心阁下。楚勇营白马庙，贼千馀来争。我分军拒战，且战且筑垒，明日，垒成。贼攻长沙八十馀日，两陷南城垛口，不能入者，天心阁犄角之力也。

九月二十日，和春命分三路击贼。中路官兵击贼垒不利。公从江公与秦军为左路，败之妙高峰麓，夺其旗。郴州贼弃郴而下，江壮节军追之，与楚勇合屯浏阳门。以贼方掘地道，湘抚张公亮基预选楚勇百人登城，备助堵缺口。

十月初二，地雷发，贼乘倒口蜂拥上。哨长徐以祥斩获数十级，队长伍坤宣夺其先锋金黄大旗，总兵邓绍良又率镇筴兵力御之，楚勇弁徐志近复率勇缒城开壕横截其地洞，每日数受伤不退，贼乃罢。朝廷以楚督驻衡未能遏贼，移两广总督徐广缙来代。又拥兵数万，驻湘潭省城外。援兵不满二万，与贼相持，战益厉，复炮毙其伪西王萧朝贵。贼知城不可陷，乃于十九夜窜宁乡。湘抚檄楚军与王壮武公鑫湘军西防湘乡之路。二十二日，贼窜益阳。

向忠武公军至，战陆贾山，官军大败。贼遂水陆并下，出林子口过洞庭，而天下骚然不宁矣。江公愤诸将屡失机宜，度不足为尽力，乃驻兵益阳，分兵剿安化土匪。适浏阳征义堂会匪起，十二月，从江公往破之，歼其渠周国儒等。是冬，公服阙。大臣论广西守城功拟保，以在忧辞。

咸丰三年癸丑，公三十六岁

正月，楚督檄江公援湖北。谓公有吏才，留浏阳鞠讯所，俘餘党胁从及愿湔洗者，全活甚众。事竣，邑绅民焚香送之，多泣下者。时曾文正公以礼部侍郎治团练长沙，知公能兵，檄召之。公不悻，既至，上手版。曾公迎笑曰：“余以军檄召君，君颇不解乎？湖南方多事，总督张公行调君，余惧君之去也。”公力请归里，曾公坚留之，并见诸湘抚骆文忠公秉章，大器之。

11

二月，常宁土匪起，骆公檄公治之，而衡山土寇亦同时动众数千人，王壮武轻骑要公还兵会剿。初九日，至衡山流霞渡，合军渡南，尽匿民舟，约见蓝旗，则出击贼。蓝旗者，楚军旗色也。初十日，贼犯流霞渡，欲渡湘，不获舟，走县东吴集。蓝旗突起，贼反走，湘军继之，奋击斩其酋，餘分别诛释，衡山平。是役楚军五百人，与湘军三百，破贼三千。

自是，湖南、北诸大府，皆欲得楚、湘军为助矣。骆公又命公治衡山蠹役狱，旬而结，还长沙。而江忠烈复函趣援通城，以三月初八日至，贼已走蒲圻，追败之，而黄梅土匪又起。二十九日，驻军黄梅城南。忠烈公已拜援皖命，军中又大疫，其弟忠济及总兵李辅朝俱卧病。乃一以兵事委公，一战而胜。明日，贼自城西分两股迎敌，又击败之。已而，潜来攻垒，复计破之，贼奔广济。忠烈已授湖北按察使，奉旨援皖。

四月，率二千人东下，次九江。而江西省城告警，乃东援南昌。甫至，贼亦抵城下。江抚张文毅公芾以军事属忠烈，自驻章江门楼，当敌冲。公驻得胜门，治守御，教守兵更番防城，兼治文书，与忠烈皆目不交睫者两月。而城内时闻掘地道声，人心惶骇。文毅偕团练大臣陈公孚恩巡城，夜半至章江门，欲有商于忠烈，适忠烈惫困而睡，不欲促之，徘徊城楼上。见灯后纸有字，取视则传单稿。凡二公是夜所虑城垛紧要处，皆已加派严密巡绰，及城中掘隧截贼地道诸布署。大惊喜曰，城无忧矣！下楼去。次日，以询忠烈。答以公所为。二公大佩服，请见，剧论，由是益知名。已而，南昌地雷屡发，城复完者，皆楚军力也。

吉安又告急。八月朔，乃檄公与李忠武公续宾、罗忠节公泽南率师自樟树岭进攻，贼分窜安福、泰和。公与李公击泰和，罗公击安福，皆平之。公之分击泰和也，忠烈病甚。江抚以楚勇守城功，犒花红约二万金，忠烈弟忠济分给不得平，兵勇大哗，公力排解之。忠烈使公立刘字旗于火神庙戏台上，使愿从者皆自来，遂成一军。是为公自立一军之始。

既而南昌已解严，而官军败绩于田家镇。公方与忠烈还军九江，恐贼上窜，亟自德化取道义宁、兴国，驰至武昌城中，大慰。已而，公寝疾。忠烈复奉巡抚安徽之命，驻军汉上，欲待公与俱东。盖忠烈自援桂林及转战长沙、湖北、江西，公尝从，忠烈知公行廉而沉深有谋，凡营垒战守、军书筹笔及调和将弁，无巨细皆倚之。至是以疾不克从，忠烈如失左右手焉。

十月，庐州战不利，围益急。忠烈书数至，公疾亦稍间，率旧部三百人，及忠烈弟忠濬在籍添募之二千人，由蕲、黄赴援。

十一月十七日，至庐州西南四十里铺。先一日，总督福恒败溃于水西门外。总兵勤勇公音德布营三十里铺，闻公至，大喜，